


Edificio di Ex-Havenkantoor ta parti di Paseo monumental mañan



ORANJESTAD(AAN)-- Durante di e Paseo Monumental, Edificio di Havenkantoor, situa riba A.M. Schuttestraat # 2 den Oranjestad, tambe ta habri su portanan for di 10'or di mainta mañan.

Informacion di A.M. Schuttestraat # 2

A construi e ex oficina di waf na 1940 y e ta un diseño di 'Dienst Openbare Werken' (DOW) di Curaçao. E necesidad pa e edificio aki a bin door di un aumento di trafico maritimo y un mehoracion di e waf na aña 1939, unda entre otro a hancha e rand di e costa. Anteriormente asunto di waf tawata sosode den e cas di gezaghebber cu tawata data for di siglo 19°. E cas aki ya no ta existi mas y tawata situa unda awe ta Renaissance Hotel. E oficina aki ta traha riba un tereno cu a gana acerca door di dempelo di lama. Originalmente tawata uza e di dos piso di e edificio como post di vigilancia di waf. Tambe tawatin un oficina di aduana, unda tawata declara mercancía. E caracter original di e oficina aki a desaparece por completo. Door di construccion na rand di awa y e posicion di e hijskraan entre e oficina y lama, e rela-

cion entre e oficina y waf a bira limita y e edificio a keda isola. E oficina ta situa na e huki robes di e T-splittings di L.G. Smith Boulevard y A.M. Schuttestraat. E nok di e edificio y e trapi pa e di dos piso ta core paralelo cu A.M. Schuttestraat. Door cu a pone instalacion di aircor mas recien a remplasa e bentananan. E entrada ariba na e trapi tawata core te na e fachada banda pazuid, mientras cu awendia e trapi aki ta parcialmente cubri cu dak y ta forma parti di e interior riba e di dos piso. E colo di e edificio ainda ta ilustra e colornan comun pa oficina di gobierno; muraya geel/creme, cu un rand abou den colo preto/shinishi y acento blanco y berde. E edificio ta un bunita ehempel di 'Zakelijk of Nieuw Bouwen'.

E arkitecto Sr. Serge I. Thijsen di Thijsen Engineering & Consultancy N.V. hunto cu su team di su oficina lo duna e recoridonan na Edificio di ex-Havenkantoor, durante di e Paseo Monumental IV 2014.

Warda e articulo aki y sigur por uza esaki como fuente durante Paseo Monumental IV 2014.